

Maneho di Pieu

Colegio San Antonio
2020 – 2021



E documento aki tin como meta pa duna informacion na mayor encuanto pieu. Nos ta splica e procedura cu ta tuma lugar si descubri pieu cerca un alumno di nos scol.

1. Informacion General

1.1 Kico ta pieu di cabes (hoofdluis)?

Pieu di cabes ta un parasito cu ta wordo constata solamente cerca hende. Nan ta biba di e sanger di e victima. Pieu ta prik den e cabes di su victima pa e por chupa sanger. Pieu por varia den grandura y por tin di un color shinishi pa un color bruin. Pieu tin e habilidad di adapta su mes na e color di cabey di e victima. E area caminda pieu ta concentra su mes ta principalmente den puyino, tras di orea of den nek. Nan ta busca lugar den cabey cu ta mas cayente. Contrario na loke hopi hende ta pensa, pieu no por bula. Loke nan por haci si ta cana hopi liher di un cabey pa otro of den caso di contaminacion, di un cabes pa otro. E pieu femenino por pone te cu 8 webo pa dia.

1.2 Con bo por haya pieu?

Tur hende por haya pieu. No ta haci diferencia entre un mucha, hoben of adulto. Pieu ta busca cabey limpi debi cu nan por pega mas facil na un cabey cu no ta "vet". Esaki ta otro ekibocacion den nos poblacion. Cu otro palabra, higiene personal no tin influencia riba contagio cu pieu. E motibo pakico principalmente mucha chikito y hoben ta haya pieu, ta paso nan tin mas contacto cu otro na momento di hunga of haci deporte. Pieu ta pasa na momento cu literalmente muchanan ta pone cabes na otro. Pa e motibo aki ta pidi atencion special pa e alumno cu tin ruman chikito na cas.

1.3 Con por sa cu un alumno tin pieu?

Sintomanan cu por indica cu un alumno tin pieu ta:

- Grawata cabes constantemente. Vooral na frenta, tras di orea of patras den nek.
- Concentracion di webo of pieu den e areanan ya menciona cu ta puyino, area tras di orea y cerca di e nek.
- Por waknan ta cana den e mucha su cabey.

1.4 Con por evita contagio cu pieu?

Entre otro ta recomenda e siguiente pasonan pa evita pieu.

- Si e alumno tin cabey largo, wanta esaki den un paardenstaart of vlecht e cabey.
- Controla e cabey di e mucha frecuentemente.
- Si constata pieu, actua di biaha y trata esaki cu e productonan necesario manera ta shampoo special, peña special, etc. Tur esaki ta obtenibel na botica.
- Controla cabes di tur otro miembro di famia. Especialmente si tin mas yiu chikito.

2. Procedura den scol

E sa pasa cu na nos scol tin brote di pieu. Den caso di descubri pieu cerca un alumno of ta sospecha cu un alumno tin pieu, lo pasa na e siguiente procedura.

- control di e alumno(nan) concerni;
- indica na cas cua ta e situacion;
- pidi mayor pa busca e alumno na scol di forma inmediato;
- control na momento di bolbe scol bek;
- spot check despues di un siman cu e alumno a bolbe bek scol.

Si despues cu e alumno bolbe scol ta constata cu e alumno ainda tin pieu, lo indica na mayor pa tene e alumno na cas pa un periodo mas largo.

3. Posibel perdida di prueba

Si durante di e periodo di ausencia e alumno a perde un prueba, e tin e derecho di traha un "inhaaltoets". E ta keda e responsabilidad di e alumno pa tuma contacto cu su docente y haci un cita.

4. Kico nos ta spera di cas

E colaboracion cu cas ta importante pa trata e situacion delicado aki. E meta principal di scol ta pa e alumno wordo trata y bolbe scol bek mas liher cu ta posibel pa asina perde menos les of prueba. Pa e motibo aki ta importante pa keda controla e alumno su cabey regularmente.

